

中華律藏

中華律藏

第三十二卷

歷代大藏經律部文獻・中國撰述（二十三）

國家圖書館出版社

佛說齋經科註

吳 優婆塞 支謙 譯經
明 求寂男 智旭 科註

將釋此經兩番立義一附文二踴節一附文者略如菩薩戒義疏先出三重立義第一釋名第二出體第三料簡釋名者此據在家二衆弟子年三月六所受名爲八關戒齋或開爲九今合爲八以不殺等名戒不非時食名齋而總稱齋者舉別以該總舉體以稱支也復次齋亦名戒佛所制故戒亦名齋齋三業故身齊則無穢惡口齊則無諸過心齊則無煩惱諸漏夫一日一夜秉志虔誠內以五念淨其志意外以八支束其身口三業道淨出世正軌此則因緣所生義也內不見有受齋之我外不見有授法之人中亦不得所受之法而一心修習不懈不退無有猶豫此則即空義也依此齋法遂有十界因果不同所謂或信不信或受不受或持或毀或著相受持或離相受持或但自爲或爲衆生或不究竟或令究竟此則即假義也一日

一夜性非分劑八支五念體是法界能持所持若事若理當體絕待舉一全收故曰齋之爲言齊也海印炳現橫豎窮更無一法而不周備乃名爲齊此則即中義也欲令易解作此次第分別得意爲語因緣即中空假亦然佛說及經具如常釋第二出體者正以不非時食而爲齋體餘支助成蓋生死正因無如姪欲生死增上勝緣無如飲食是故經云一切衆生皆依姪欲而正性命又云一切衆生皆依食住而在家五戒未能永捨家業眷屬緣累故令於六齋日受此八關戒齋一日一夜種未來世永出因緣以齋爲體則簡下非終身五戒上非沙彌十戒據此所受一日一夜戒之與齋亦發一日一夜無作善色以從清且秉受之後法爾止惡行善法爾出生無漏功德故也第三料簡者有六種人得受此齋謂菩薩近事男女若年三月六不受此齋得失意罪半滿諸戒及但三歸近事男女於年三月六應受此齋作出世因八部鬼神及畜生解語者亦得秉此齋法冀脫苦輪有九種人

受不成齋謂受菩薩戒而根本破者及比丘比丘尼式叉摩那沙彌沙彌尼優婆塞優婆夷已破根本戒者及受此一日一夜齋法而破根本四重戒者皆不堪受或依大乘懺悔得見好相仍任更受也受此齋法須一出家人爲作證明不問大小兩乘五衆但令畢世不非時食者便可爲師設數里內決無其人或可對經像前自誓兼受耳

二跨節者復爲五重謂單法爲名實相爲體出世正因爲宗生天泥洹爲用置毒酪中爲教相初法爲名者所謂齋也齋是齊義心佛衆生三無差別故名爲齊迷此一心上齊諸佛故殺盜淫妄飲酒嗜食耽染五塵不知慚愧迷此一心下齊含識故於平等法中生自他想起愛起見著我損人迷此一心全體中道故或犯事殺或犯理殺或犯事盜或犯理盜淫妄飲食華香樂座無不皆然致成十界因果差則今了知法性無染離五欲過隨順修行尸波羅蜜八支五念若事若理具足清淨遂令身口意業契會中道上合諸佛慈力下同衆生悲

仰名之爲齋文云盡一日一夜持心如真人乃至如清淨戒以一心習此之謂也次實相爲體者原此一經出自阿含應同三印若無三印便成牧牛及尼健齋緣有三印成佛法齋而今既秉法華開顯至教須知三印實惟一印以生死涅槃無二體故若歷法廣明者不殺戒護念一切體是無緣大慈不盜戒無所損惱體是無緣大悲不淫戒清淨無染體是離垢梵行不妄語戒正直誠信體即真如不飲酒戒心無放逸體即靈智不著香華戒離諸僞飾體是清淨莊嚴不歌舞戲論諸喧掉體是禪那不好牀戒離憍慢意體是諸法空座不非時食戒中道之外更無所須體是究竟種智念佛者體即般若念法者體即法身念衆者體即解脫念戒者體是三聚亦即三德念天者體是第一義諦

一日一夜體亘古今如此皆是實相異名故直以實相爲正體也次出世正因爲宗者世有三種一同居世間二方便世間三實報世間持即空齋是出同居正因持即假齋是出方便正因持即中齋

是出實報正因也。次生天泥洹爲用者。生天是近果。泥洹是遠果。復次有果報。天淨天第一義。天持此齋者。悉得生之。有圓淨泥洹。方便淨泥洹。性淨泥洹。持此齋者。終皆得之。次置毒酪中爲教相者。如初爲提謂說五戒法。已多密悟無生法。忍此胡不然。況今行者。秉法華意。而受此齋。安得不於齋中具佛性住。秘藏耶。是事可知。無俟廣說也。

入文爲三初序分二正宗分三流通分

△初序分二初證信二發起今初

聞如是一時佛在舍衛城東丞相家殿

證信有五句一聞二法體三時四主五處所略無

同聞凡受齋法或至僧伽藍中或詣一師至自家

中今卽家中受也

△二發起

丞相母名維耶早起沐浴著綵衣與諸子娘俱出稽

首佛足一面坐佛問維耶沐浴何早對曰欲與諸娘

俱受齋戒

在家二衆俱應受齋今丞相母爲發起者女人役

役家業兼受尤難舉難以顯易也又優婆塞受齋就寺爲便優婆夷受齋就家爲便維耶未見翻譯綵衣者在家常服既無妨於八支故不特制壞色若已受菩薩近事戒畜無縫三衣者於齋日應得著之

△二正宗分二初扣機二正示初中二初佛反扣

二當機請今初

佛言齋有三輩樂何等齋

輩者類也齋法是同祇緣兼受心異遂成三別不

可不審擇其所樂蓋志樂愛見正法亦邪志樂大

明福乃無極

△二當機請

維耶長跪言願聞何謂三齋

△二正示二初列名二各釋今初

佛言一爲牧牛齋二爲尼嚩齋三爲佛法齋

依愛同於牧牛依見同於尼嚩斷除愛見而修八

支五念名爲佛法也尼嚩此云離繫外道之名

△二各釋二初略釋二非二廣釋一是初中二初



釋牧牛齋二釋尼犍齋初中二初標二釋三結今初

牧牛齋者

△二釋又二初喻二合今初

如牧牛人求善水草飲飼其牛暮歸思念何野有豐饒須天明當復往

喻此日雖從佛法受齋而不持心八支不習學五念乃懸想次日五欲猶如牧牛者懸想明日水草也例而推之今生奉持佛戒喜願未來人天受樂皆如牧牛

△二合

若族種男女已受齋戒意在居家利欲產業及念美飲食育養身者是爲如彼牧牛人意

雖受齋戒不思出世八支五念法門緣墮愛網故如牧牛

△三結

不得大福非大明

夫一日一夜齋戒之法本是出世正因而心期五

欲愛網自纏譬如摩尼寶僅買一衣一食故不得出世大福緣無出世大智光明廼使心期陋劣如此故結判云非大明也

△二釋尼犍齋三初標二釋三結今初

尼犍齋者

△二釋又二初正釋二出過今初

當月十五日齋之時伏地受齋戒爲十由延內諸神拜言我今日齋不敢爲惡不名有家彼我無親妻子奴婢非是我有我非其主

爲者向也由延亦云由旬四十里也向諸神拜不知歸向三寶故也然不敢爲惡等雖不徧列八支大意亦與佛戒相似故下方正出其過

△二出過

然其學貴文賤質無有正心至到明日相名有如故事

夫既不名有家彼我無親則與佛法何異而僅稱尼犍齋者非但爲其不知歸憑三寶良以其學貴文賤質無有正心故也賣文者致飾於外以圖悅

人耳目賤質者不知眞修實詣反本還源也直念眞如名爲正心不脫見網名無正心見惑既紆愛習仍在故至明日仍如故事也然外道所以貴文賤質無有正心者良緣不知三寶出世法門今雖歸憑三寶而不圖出要仍復貴文賤質當知同彼外道尼健若細分之應作四句一者不歸三寶貴文賤質卽眞尼健二者不歸三寶質直好義卽此土儒宗祇因未逢三寶法門故不歸憑未有質直正心之士遇三寶而不歸者也三者歸向三寶質直正心卽是眞佛弟子四者雖歸三寶貴文賤質卽是附佛法之外道以例推之受戒者貴彰持律之名而性遮諸業未必微細清淨演教者貴彰弘法之名而修證要途未必精徹明了參禪者貴彰機用之名而已躬下事未必窮源極底修懺者貴彰聲儀式之名而事戒理觀未必深諳力行皆尼健流類耳若約教論文論質及論正心則九界皆名尼健

△三結

齋如彼者不得大福非大明

謂雖受佛齋而如彼之貴文賤質無有正心則似置醜闢於毒器何能養人非出世福慧也

△次廣釋一是三初標二釋三結今初

佛法齋者

△二釋中二初八戒次五念初又二初示日期二釋戒相今初

道弟子月六齋之日受八戒

道弟子謂在家秉承佛道之弟子也從但三歸至菩薩戒在家二衆俱得此名月六齋日者初八日十四日十五日二十三日二十九日三十日也若月小者取二十八日足之此六日是四天王及太子使者巡視世間之日受齋修福功倍餘時不言年三長齋月者月齋稍難容可隨力日齋最易尤應秉承年三月者正月五月九月毗沙門天王分鎮南洲亦應受齋修福也八戒具如下列或開香華歌偈爲二則第九不非時食獨得齋名開合雖殊義體無別或者難曰爲善去惡理應相續若但

制六日則餘日便可爲惡若餘日爲惡待天神巡視而後修善不幾爲小人之掩不善而著善乎君子視之已見肺肝謂天神而可欺乎答曰夫受六齋者非謂平日便可爲惡也大戒五戒兼之終身八關戒齋加於六日譬如列國諸侯平日何嘗不修政布德士農工賈平日何嘗不勤職務業迨夫巡狩省試之期亦必倍加警飾故梵網有不敬好時之戒而善生經中亦制不受六齋得失意罪良有以也此爲菩薩增上功德亦爲近事種出世因下乃旁爲一輩多罪衆生雖不能相續修善亦使之暫離惡業倘馴而致之萌芽漸生牛羊弗牧安知不蔚爲牛山美木耶孔子曰有能一日用其力於仁矣乎吾未見力不足者又曰一日克己復禮天下歸仁焉一日齋戒亦如是矣縱令上根者少而日月至焉亦猶愈於暗亡不反者也故知如來立法普利三根或不遠而休復或頻厲而無咎或與進而不與其退與潔而不保其往願受者自審何如耳

△二釋戒相八第一殺戒至第八非時食戒第一殺戒

第一戒者盡一日一夜持心如真人無有殺意惡念衆生不得賊害喫動之類不加刀殺念欲利安莫復爲殺如清淨戒以一心習

釋此戒相各爲三意一因緣二約教三觀心因緣釋者夫衆生習性各有所好喜長時者爲說長時或盡形壽或盡未來喜短時者爲說短時或一刹那一念一日七日一年等今言盡一日夜卽是隨樂欲說夫八支淨戒雖則甚易亦復甚難盡一日夜則雖難而易不得半日及半夜等則雖易而難故以一日一夜而爲分劑不減不增人可信受信受卽皆歡喜世界悉檀也善法易成則善心必生爲人悉檀也制有定限罔敢虧違則惡意必滅對治悉檀也涅槃名曰生死名夜涅槃卽生死名盡一日生死卽涅槃名盡一夜日夜俱盡生死涅槃兩不可得則坐斷三世豁然入理第一義悉檀也持心如真人者阿羅漢翻無著亦翻不生亦翻應

供亦翻應真今翻真人此乃出世聖果而持心如
之以凡如聖人所樂聞世界悉也如聖成就善法
即爲人益如聖不作諸惡即對治益我如真人如
一如無二如即入理益無有殺意者猶如真人永
斷殺習此總標也慈念衆生別明行善不得賊害
等別明止善念欲利安申明行善莫復爲殺申明
止善止行二善名爲諸佛清淨之戒今以一心而
修習之故得名爲持心如真人也次約教釋者時
無實法依於色心分位假立則有日月歲劫之殊
日出名晝日沒名夜是中無我所藏教意也日
無出沒晝夜性空通教意也時既性空故可延一
日以爲永劫亦可促永劫以爲一日令諸衆生各
別知見別教意也十世古今始終不離當念一利
那性即是亘古亘今之性不見有法出於一日一
夜之外名盡一日一夜圓教意也斷盡見思名爲
真人不殺生緣成生緣慈名清淨戒藏教意也見
思如虛空不可得名爲真人不殺法緣成法緣慈
名清淨戒通教意也斷盡三惑名爲真人不殺生

緣不殺法緣不著我緣次第成就三慈名清淨戒
別教意也三惑之性即三般若體惑成智名爲真
人不動佛性成無緣慈名清淨戒圓教意也三觀
心釋者先觀心因緣夫長時短時悉惟是心心謂
是長則短時亦長如黃梁未熟已過名闕心謂是
短則長時亦短如斧柯已爛未終一局了知長短
惟是自心則能隨意建立長短是觀心世界悟長
非長故無量劫中習行諸度不生懈倦是觀心爲
人知短非短故剎那造罪殃墮無間不敢放逸是
觀心對治長短皆是法界無復長短可論盡一日
一夜即是盡生死涅槃之本際是觀心第一義也
觀心本自可爲真人發意如之是歡喜益成就善
種三業似聖是生善益觀心遠離垢穢不與聖遠
是滅惡益觀心成就聖道實無聖道可得是入理
益次觀心約教者觀心無我所時劫亦然愛見
則斷如於真人藏教意也觀心猶如虛空性不可
得時劫愛見皆同虛空如於真人通教意也觀心
假名無量時劫差別亦復無量智斷證得亦復無



量如於真人別教意也觀心絕待體是法界時劫
惑智無非法界如於真人圓教意也觀一念心具
足半滿權實諸法無欠無餘安得不約觀解申此
八支五念之實義耶

△第二盜戒

第二戒者盡一日一夜持心如真人無貪取意思念
布施當歡喜與自手與潔淨與恭敬與不望與却慳
貪意如清淨戒以一心習

三釋例前可解下皆倣此無貪取意先明止善思
念布施等次明行善歡喜等四句具四悉意歡喜
即世界自手即爲人生他善故潔淨即對治遠離
惡故恭敬即第一義觀生如佛故次不望句即行
論止謂與時無有望今報後報心也歡喜四句是
却慳心不望與句是却貪心慳財慳法貪有貪空
貪二邊貪中道等悉皆却除是名諸佛清淨之戒
△第三姪戒

第三戒者一日一夜持心如真人無姪意不念房室
修治梵行不爲邪欲心不貪色如清淨戒以一心習

無姪意二句先明止善修治梵行次明行善梵行
者四禪四等也不爲邪欲二句重明止善姪名貪
染染男女染味禪染偏眞染幻有染但中諸意悉
無名無姪意人間房室色無色界房室有餘房室
果報房室皆悉不念名爲不念房室知禪即空即
假即中成就生緣法緣無緣慈等名爲修治梵行
心外取法皆名邪欲九界善惡漏無漏法皆名爲
色一切不貪名清淨戒也

△第四妄語戒

第四戒者一日一夜持心如真人無妄語意思念至
誠安定徐言不爲僞詐心口相應如清淨戒以一心
習

無妄語意總標永離四過思念至誠即無未得言
得諸愆安定即不綺語徐言即不惡口不爲僞詐
即不兩舌心口相應即不妄言皆含止行二善之
意可以思得

△第五飲酒戒

第五戒者一日一夜持心如真人不飲酒不醉不迷

亂不失志去放逸意如清淨戒以一心習

不飲酒勾總標離衆失也醉及迷亂皆飲酒必招之過失志放逸則飲酒之流類也充類至盡於三士六塵咸無放逸方名清淨戒耳

△第六香華歌舞戒

第六戒者一日一夜持心如真人無求安意不著香華不傳脂粉不爲歌舞倡樂如清淨戒以一心習色聲香觸等塵乃六情諸根所安今關閉六情專求出要故不著不傳不爲也例而推之迦葉聞琴起舞猶是界外思惑未除必三士香華歌舞皆悉不著不爲方名清淨佛戒

△第七高廣大牀戒

第七戒者一日一夜持心如真人無求安意不臥好牀卑牀草席捐除睡臥思念經道如清淨戒以一心習

高廣嚴飾名爲好牀縱恣睡眠小死無異今捐除睡臥卽是止善思念經道卽是行善以例推之有法可倚可著皆名牀臥證諸法空無住爲住斯名

清淨戒矣

△第八非時食戒

第八戒者一日一夜持心如真人奉法時食食少節身過中日後不復食如清淨戒以一心習

此正名齋例須三釋初因緣者佛眞法身非俟食養應身同人示資飲食日輪當午慈哀受供十方善逝咸然三世如來一轍順諸佛法人所樂聞世界悉也以時受食資身辨道身無病苦心得安間爲人悉也離舌端貪嗜之過無數數管理之煩減食節身姪意漸薄對治悉也日中以表中道中道之外更無所需第一義悉也約教者隨界隨洲用人間法一線若過禁不復咽藏教意也時雖本空如幻分別午食尙無味著過中豈更貪求了卽空故不起犯心通教意也依破齋故出生三惡趣果依持齋故出生善道及三乘果誓以此齋自利利他上求下化莊嚴中道趣會極果別教意也中道卽是法界一止一作亦皆法界午前而食願令法界衆生咸得契會中道午後不食願令法界衆生

永不迷背中道繫緣法界一念法界圓教意也觀心者根塵相對皆有食義如眼以睡爲食耳以聲爲食等若墮聰黜明便成斷滅見網若尋聲逐色又復流浪愛河今云時食則但緣現量復云少食則無所食求既不永乖物情亦不令他憎惡即觀心世界法食資神即觀心爲人斷非法食即觀心對治契會中道即觀心第一義也六塵無我我所非斷非常名爲中道心不緣斷常非法之食名不過中藏教觀也六塵性空如幻非有非無名爲中道心不緣有無二邊之食名不過中通教觀也六塵各各互生諸法具造十界而性非十界迤出一邊名爲中道心不取生死涅槃二諦之食名不過中別教觀也六塵體即法界具足百界千如隨舉一塵一切法咸趣此塵是趣不過不於此一塵外別有少法可得名不過中如一塵一切諸塵亦復如是如一切塵一切諸心諸法諸假名等亦復如是無不當體即中不見有法出過於中名不過中圓教觀也如此諸觀皆依不非時食而爲事境若

無事境理觀不發故荆溪云世人蔑事而欲尙深理者驗知此觀孤虛無本既虧觀境觀亦安從噫可以思矣

△次五念二初標徵二解釋今初

佛告維耶受齋之日當習五念何謂五

△二解釋五初念佛至五念天初中二初示念境

二明念益今初

一當念佛佛爲如來爲至眞爲等正覺爲明行足爲善逝世間父無上士經法御天人師號曰佛

示念境中略明十號若知十號功德則知佛位一切高廣功德亦須略以三釋明之初因緣者如世間聖賢亦多嘉號聰明睿智神聖英哲等如天帝釋有千名字隨德立號令衆樂聞廣則具如雜華名號品今略舉通號十種以彰具德世界悉也若聞如來十號能生世出世間種種善根爲人悉也十號威德能令聞者破狹劣心破輕慢心敬仰畏憚不敢萌於惡意對治悉也一一名號實義相應聞名識義不復遠求第一義悉也梵語多陀阿伽

度此翻如來若云無所從來亦無所去故名如來
 卽約法身釋也若云如法自性來成正覺卽約報
 身釋也若云乘如實道來度衆生卽約化身釋也
 梵語阿羅訶此翻應供亦翻應眞今翻至眞爲世
 福田故名應供冥自眞性故名至眞緣冥眞故堪
 作世祐也梵語三藐三佛陀此翻正徧知今翻等
 正覺等卽徧義具明差別法門名之爲等此異二
 乘深知無差別性名之爲正此異凡外也具足三
 明爲明行足妙超三有名爲善逝世間父亦名世
 間解自己解脫能解世間如長者自出火宅能令
 諸子出火宅也一生補處猶爲有上位極妙覺更
 無過者名無上士經法御亦名調御丈夫具丈夫
 法乃能說經調御衆生也六道以天人爲勝又三
 乘聖衆皆在入道天中佛爲天人師範卽九界同
 秉教誨也自覺覺他覺行圓滿故號曰佛不言世
 尊者十號具足卽是世間最尊舉別而略總也次
 約教者徧眞無去來相證於徧眞以此度生爲如
 來等知世間諸法正知出世涅槃爲等正覺具知

過現未來爲明行足超脫三有名善逝脫六凡之
 縛爲世間父在四果支佛之上爲無上士說九部
 十一部十二部經詮生滅理調御衆生爲經法御
 同居之尊爲天人師自覺徧眞亦以徧眞覺他二
 覺皆滿名佛此藏教義也生死卽眞空涅槃故無
 來去證於卽空以此度生爲如來眞不異俗故等
 俗不異眞故正爲等正覺觀過未現在性空寂滅
 不可得爲明行足卽三有而不著三有爲善逝解
 脫六凡二乘之縛爲世間父在三乘九地之上爲
 無上士說十二部經詮無生理調御衆生爲經法
 御同居方便之尊爲天人師自覺卽眞亦以卽眞
 覺他二覺皆滿名佛此通教義也中道迥出二諦
 故無來去證於中道以此度生爲如來等知二諦
 正知中諦爲等正覺極過去際盡現在際窮未來
 際悉見悉知爲明行足次第超出同居方便實報
 三種國土爲善逝解脫六凡三乘之縛爲世間父
 在十地等覺之上爲無上士說十二部經詮無量
 理調御衆生爲經法御同居方便實報之尊爲天



人師自覺三諦亦以三諦覺他二覺皆滿名佛此別教義也中道徧一切法故無來去證於圓中以此度生爲如來覺第一義諦卽二諦名等覺二諦卽第一義諦名正爲等正覺十世古今始終不離當念皆入三世而無往來於剎那際三昧中示現劫海成菩提事八相之中復具八相不可思議爲明行足三種國土無非寂光爲善逝解脫十界皆集爲世間父在四十一位法身之上爲無上士說十二部經證無作理調御衆生爲經法御四土之導爲天人師自覺不思議一實諦二諦三諦四諦亦以覺他二覺皆滿名佛此圓教義也觀心釋者觀此現前一念之心不在內外中間諸處非有青黃長短等相去來現在求不可得而了了明明數數生起是爲如來此心既無方隅相貌過現未來則本無幻妄是爲至真此心徧知一切諸法無有一法可喻此心爲等正覺此心無始無終亦無邊際爲明行足此心徧造十界而終日隨緣終日不變是爲善逝此心不被十界之法所縛而能出生

十界諸法爲世間父此心能等一切諸法而無一法能等此心爲無上士此心具足覺觀語言之道一心曉訓餘心心所爲經法御此心能天能人而非天人之所能爲爲天人師此心法爾靈知不昧覺了自他無有不盡故號曰佛初觀此心具足十號上等諸佛慶已慶他卽世界益觀心具足十號成就善根功德卽爲人益觀心具足十號破壞見愛無知無明卽對治益觀心具足十號一具足一切具足究竟平等不減不增卽第一義益約因緣所生法觀則此心具足藏教十號約卽空觀此心具通十號約卽假觀此心具別十號約卽中觀此心具圓十號也

△二明念益三初正明二喻顯三法合今初

是念佛者愚癡惡意怒習悉除善心自生思樂佛業佛既有四教三身十號之不同念亦有四教念自念他雙念自他之差別若欲委知具如大佛頂經勢至圓通文句云云愚癡惡意怒習悉除卽是止善善心自生思樂佛業卽是行善於止善中略舉

破壞三毒言惡意者即是貪染五欲之毒三毒有正有習正習悉除所謂千年闇室一燈能破也念法門能除愚癡念實相能除惡意念相好能除怒習此猶對當爲語盡理言之念念皆除三毒正習於行善中善通因果佛惟在果善善心白生者生離欲心生出世心生下化心生上求心生究竟無上種智之心言思樂佛業者三聚淨戒是佛業百八三昧是佛業三智五眼是佛業大慈大悲大喜大捨是佛業安住眞如是佛業同流九界是佛業誘化一切是佛業依藏教念自佛念他佛念自他佛除同居三毒正習生離欲及出世心思樂藏教果佛種種妙業依通教三種念佛除同居方便三毒止習生出世及下化心思樂通佛妙業依別教三種念佛除同居方便實報三毒正習生下化及上求心思樂別佛妙業依圓教三種念佛除四土三毒正習生究竟無上種智之心思樂圓佛妙業同寂光那有三毒正習答此約分證寂光言也此文亦具四悉檀意念佛卽世界三毒除卽對治善

心生卽爲人樂佛業卽第一義也

△二喻顯

譬如以麻油澡豆沐頭垢濁得除

麻油澡豆除穢之物喻四教念慧皆除惑之具也依於一體三寶而有住持三寶於三寶中佛寶最尊喻之以頭當知住持佛寶卽吾自體佛寶也垢濁既除頭則清淨念佛功成佛性顯現矣

△三法合

齋念佛者其淨如是衆人見之莫不信好

緣受齋故念佛緣念佛得成齋自淨卽令衆人信好可見自利爲他之本所以君子求諸已也

△二念法二初示念境二明念益今初

二當念法佛所說法三十七品具足不毀思念勿忘當知此法爲世間明

佛法無量而三十七品具足始終修證途轍故獨舉之分爲七科一四念處謂身受心法爲所觀境二四正勤謂緣念處觀令未生惡不生已生惡除滅未生善得生已生善增長三四如意足謂欲念



進慧於中思惟則定思惟則斷善能成就神通四
五根謂信進念定慧成無漏根五五力亦如根名
謂信等增長能破五障六七覺支謂念擇法精進
喜輕安定捨調攝其心不沉不浮而入見道七八
正道謂正見正思惟正語正業正精進正定正念
正命安隱在道中行此三十七品四教名數皆同
而觀慧各異復各有豎入橫具之不同此能運載
三士衆生到三涅槃故爲三世間明所應具足不
毀思念勿忘也

△二明念益三初正明二喻顯三法合今初

是念法者愚癡惡意怒習悉除善心自生用樂法業
念四教法除四土三毒正習等例前可解

△二喻顯

譬如以麻油澡豆浴身垢濁得除

受齋則以法爲身故卽以身喻法味此法身性本
清淨幻成三惑垢濁垢既除法身顯矣

△三法合

齋念法者其淨如是衆人見之莫不好信

△三念僧二初示念境二明念益今初

三當念衆恭敬親附依受慧教佛弟子衆有得溝港
受溝港證者有得頻來受頻來證者有得不還受不
還證者有得應眞受應眞證者是爲四雙之八輩丈
夫皆爲戒成定成慧成度知見成爲聖德爲行具當
爲叉手天上天下尊者福田

梵語僧伽此翻和合衆今但言衆者以四雙八輩
法爾具足事理二和故也律中明僧有四種一無
慚僧謂破戒者二啞羊僧雖不破戒昧法律者三
清淨僧謂內外七賢及持戒凡夫四眞實僧謂四
雙八輩今令念眞實僧故言恭敬親附依受慧教
也恭敬約意親近約身受教約口十六心滿初登
聖位名得溝港猶云預流卽須陀洹果入忍具足
智少一分名受溝港證者謂無間必當證溝港道
卽須陀洹向斷欲界思六品名得頻來猶云一往
一來卽斯陀含果斷五品時名受頻來證者卽斯
陀含向斷欲界九品思盡名得不還猶云不來卽
阿那含果斷八品時名受不還證者卽阿那含向

斷三界惑盡名得應真。謂與真諦常相應故。即阿羅漢果。進斷非非想思。名受應真證者。即阿羅漢向。合爲四雙。分爲八輩。輩者類也。具足智斷故名。丈夫性。遮清淨無作體。不可壞名爲戒。戒成入解。九次第等名爲定。成見四真諦名爲慧。慧成於有爲諸行得解脫。名爲度。成文缺。度成二字。分別解脫因果。不謬名爲度。知見成具慧。行入正位名爲聖德。具行行滿足功德名爲行。具以要言之。前三果及四向是分證五分法身。阿羅漢果是滿證五分法身也。當爲叉手結成能念。舉叉手以攝三業。天上天下尊者。福田結成所念。舉福田以顯德行也。然在家菩薩受齋念衆於眞實僧。固應三業精勤於清淨僧。亦應禮拜供養。即啞羊及無慚僧尤不應輕慢毀辱。如象王羅刹尙敬服袈裟者。不害不食。何況歸依三寶。自稱近事淨行者乎。十輪明訓。昭若日星。投鼠忌器。世法可喻。思之慎之。又此四雙五分。且約藏教爲釋。行門則觀慧雖殊。斷證無別。別圓須約界外見思法性五陰以辨人法。故知言

雖在小義實該大。又觀心僧寶者。此心本非色聲香味觸法。名須陀洹。此心利那生滅名斯陀含。此心滅已無朕名阿那含。此心四性不生名阿羅漢。此心性無染汗爲戒。成此心性不動搖爲定。成此心性不可昧爲慧。成此心性非有爲名度。成此心偏知有爲無爲諸法名度知見。成乃至歷四教明觀可以意得。

△二明念益三初正明二喻顯三法合今初是念衆愚癡惡意怒習悉除喜心自生樂衆之業

喜心即善心也餘例前可知

△二喻顯

譬如以浮灰浣衣垢污得除

浮灰亦譬四教念慧僧寶屬解脫德故以衣譬即所謂解脫服也。又是慚愧莊嚴。又是寂滅上忍性具僧寶如身必有衣念慧除垢則解脫清淨衆德莊嚴柔和善順矣。

△三法合

齋念衆者其德如是衆人見之莫不好信